

Yan Palay « Coûndes Biarnés »

En entran, lou curè que bedou la becade  
 Qui hasè sous landrès û petit biroulet.  
 Munids l'û d'û pichè, l'àute d'û yambelet,  
 Qu'anèn dounc t'abrouca la mey bielhe barrique.  
 Lou pràube Casaussus n'abè pas pensad brique,  
 Aban de hourada, de-s ha lou calamet.  
 « Hique lou dit sou trauc : que bau tourna de tire,  
 Se dit lou caperâ, qu'èy lèu hèyt û brouquet. »  
 En han lou cabillot, « *C'est Satan qui m'inspire!* »  
 Se dit en et medich. N'èy pas arrés au tour,  
 Pendarde de Casaussus, que bau youga-t û tour.  
 Que se-t pren la becade e, chens cor ni tambour,  
 Que-s saube au gran galop de cap au presbitèri.  
 Casaussus que-s disè : « Diàble lou yupitèri !  
 Aquet tros de brouquet b'èy plâ loung à trouba ;  
 La becade, entertan, lhèu, que se-m ba brusla...  
 Toutû, se noû bié pas, be cau plâ que l'apèri...

— Que hêts, Moussu curè ? Qu'èy sourd aquet pacan...  
 E pourtat lou brouquet ou b'en hêts fabrican ?  
 Noû se-m minyaré pas tout soulet la becade !...  
 En û moumen qu'audi lou brut d'ue escloupade :  
 « Ets bous, Moussu reyen ? » Qu'ère la Yanetoû  
 Qui bienè de serca de que ha las crespères.  
 « Qu'ès tu, hòu ? Sàbi, dounc, coürri bìste'nta you,  
 Diàble d'arremouliâyre, oun lou perigles ères ?  
 Arribe tout de tire e porte û tros de hus,  
 Que soy plantad aci desempuch l'*Anyelus*.

En arriban dehens, ni curè ni becade !...  
 « Qu'èy partid, lou caddèt, que l'a s'en a pourtade,  
 Mes que la-m pagara mey care qu'au marcad. »

Confus coum û renard per û poulet gahad,  
 Que yura de-u tourna, d'ore ou tard, la gnacade.